

malum, siue illud non nisi ob timorem evitanda.

- LXV. *Moses, Prophetæ, Sacerdotes, & Doctores Legis mortui sunt, absque eo quod ullum Deo dederint filium, cum non effecerint nisi mancipia per timorem.*
- LXVI. *Qui vult Deo appropinquare, nec debet ad ipsum venire cum brutalibus passionibus, neque adduci per instinctum naturalem, aut per timorem, sicuti bestię, sed per fidem, & per amorem sicuti filii.*
- LXVII. *Timor servilis non sibi representat Deum, nisi ut Dominum durum, imperiosum, injustum, intractabilem.*
- LXVIII. *Dei Bonitas abbreviauit viam salutis, claudendo totum in Fide, & precibus.*
- LXIX. *Fides, usus, augmentum, & premium Fidei, totum est donum puræ liberalitatis Dei.*
- LXX. *Nunquam Deus affligit innocentes; & afflictiones semper seruiunt, vel ad puniendum peccatum, vel ad purificandum Peccatorem.*
- LXXI. *Homo ob sui conservationem potest sese dispensare ab ea lege, quam Deus condidit propter ejus utilitatem.*
- LXXII. *Nota Ecclesię Christianę est, quod sit Catholica, comprehendens & omnes Angelos Cœli, & omnes Electos, & Justos terrę, & omnium Seculorum.*
- LXXIII. *Quid est Ecclesia, nisi cœtus Filiorum Dei manentium in ejus sinu, adoptatorum in Christo, subsistentium in ejus persona, redemptorum ejus sanguine, viventium ejus spiritu, agentium per ejus gratiam, & expectantium gratiam futuri Seculi?*
- LXXIV. *Ecclesia, siue integer Christus, Incarnatum Verbum habet ut Caput, omnes verò Sanctos ut membra.*
- LXXV. *Ecclesia est unus solus homo, compositus ex pluribus membris, quorum Christus est Caput, vita, subsistentia, & persona; Unus solus Christus, compositus ex pluribus Sanctis, quorum est Sanctificator.*

LXXVI. *Nil spatiofius Ecclesia Dei, quia omnes Electi, & Justi omnium Seculorum illam componunt.*

LXXVII. *Qui non ducit vitam dignam filio Dei, & membro Christi, cessat interiùs habere Deum pro Patre, & Christum pro Capite.*

LXXVIII. *Separatur quis à Populo electo, cujus figura fuit Populus Judaicus, & Caput est Jesus Christus, tam non vivendo secundum Euangelium, quàm non credendo Euangelio.*

LXXIX. *Utile, & necessarium est omni tempore, omni loco, & omni personarum generi studere, & cognoscere spiritum, pietatem, & mysteria sacre Scripturę.*

LXXX. *Lectio sacre Scripturę est pro omnibus.*

LXXXI. *Obscuritas sancta verbi Dei non est Laicis ratio dispensandi seipfos ab ejus lectione.*

LXXXII. *Dies Dominicus à Christianis debet sanctificari lectionibus pietatis, & super omnia sanctarum Scripturarum. Damnosum est velle Christianum ab hac lectione retrahere.*

LXXXIII. *Est illusio, sibi persuadere, quòd notitia mysteriorum Religionis non, debeat communicari fœminis, lectione sacrorum librorum. Non ex fœminarum simplicitate, sed ex superba Virorum scientia, ortus est Scripturarum abusus, & nate sunt hereses.*

LXXXIV. *Abripere è Christianorum manibus Novum Testamentum, seu eis illud clausum tenere, auferendo eis modum illud intelligendi, est illis Christi os obturare.*

LXXXV. *Interdicere Christianis lectionem sacre Scripturę, præsertim Euangelii, est interdicere usum luminis filiis lucis, & facere ut patiantur speciem quandam excommunicationis.*

LXXXVI. *Eripere simplici Populo hoc solatium, jungendi vocem suam voci totius Ecclesię, est usus contrarius praxi Apostolicę, & intentioni Dei.*